

Iwarakha yo upachera i Napaolo wa Natimotheo Malhove o uholhelha

Iwarakha yo upachera i Napaolo wa Natimotheo phi iwarakha yo upachera yaalhepiye ni akarumiya Napaolo unrweehelha owiittucha aya Timotheo. Iwarakha yo upachera i Natimotheo veekinaka yaalhepiye nyaakha cho 62-64 baada yo uyaria wa Kuristo. Ni yeo waari mahuku o umalhelha ukumi u Napaolo. Napaolo yaari ni unlhoko mulhupalhe ni Natimotheo phi nlhatu neehanne aya ukhalha mwaamwanaya mikwaha minchi (Afil. nlhako wo 2:22, 1 Tim nlhako wo 1:2, 1:18).

Ilha phi imoka yo iwarakha ncheshe chaakhumme u Napaolo chaari ni nchina na ntu aarwehelhiye ihikhalhaka nchina no nlhoko wa attu anrumelhenhe Kuristo. Iwarakha chikina taaru chiyo phi 2 Natimotheo, iwarakha i Natito ni iwarakha i Nafilimoni. Iwarakha yo upachera i Natimotheo ihochara ikano chinchi chinaacha mwaha wo uthimicha mmilhokoni wa attu anrumelhenhe Kuristo (nlhako wo 2:1-5), iphiro chinothananiya aya ukhalhana aholhelhi o milhoko cha attu anrumelhenhe Kuristo (nlhako wo 3:1-13), ikano chinaacha meettuchihi o woothachiya (nlhako wo 1:3-11, 4:1-5, 6:2-5). Malhove onkhaye ayo anowooniha rata Napaolo cheera aya wo weettuchiha Natimotheo ukhalha aholhelhi munlhokoni mwa attu anrumelhenhe

Kuristo. Iwarakha yo upachera i Natimotheo ihochara malhove menchi o waalhaka aholhelhi o milhoko cha attu anrumelhenhe Kuristo o mahuku ihm alha wiira aakavihe uchuwelha iphiro cho uholhelha rata mmithekoni mwaya mwo ushunga milhoko chineemelhelha aya.

Chiri nhina

Anochokholha iwarakha wo waashikuria Natimotheo (nlhako wo 1:1-2).

Tho, anowaavaha Natimotheo malhove o waalhaka o uthepa wiichinanelha ni meettuchiho o woothachiya (nlhako wo 1:3-11).

Napaolo anoothepa uhimia chineera aya wo unshukuru Yesu Kuristo (nlhako wo 1:12-19).

Napaolo anowaalhehera Natimotheo mwaha anaacha unthimicha Nlhuku ni mitheko cha aholhelhi a attu anrumelhenhe Kuristo (nlhako wo 2-3).

Anomalhiha iwarakha aya wo waavaha Natimotheo ikano cho umalhihera (nlhako wo 4-6).

¹ Mii Paolo, karumiya a Kuristo Yesu wo ulheheriya ni Nlhuku Moopolhi ihm ni Kuristo Yesu nikhulhuvelho nihu.

² Kinoolhepa iwarakha iwe uwaninyu Natimotheo anaaka e ikekjhene o munrimani.

Kinoulhapelhelhani nnema, ikiriri, ni mpuha ukhuma wa Nlhuku Athumwanihu ni Kuristo Yesu Athithi.

Waamukiya mwaha wo meettuchiho o woothachiya

³ Thoko chenre aka wo ulheherani vaarwaa aka Umakedoniya, mwakhalheke iwani yo Uefeso, mwaachiichihe attu aneettuchiha meettuchiho o woothachiya, ⁴ wiira ahiye chechiyo ithelhi chiyo ni uthanana uchuwelha mwaha wo uhimalha wo iyari cha manyaapwiiya chinowiha mwaha wo uhiiwanana, mena ahivaraka ntheko wa Nlhuku thoko unochuwaniaa wo nrima. ⁵ Kinoulheherani chiicho ukurumicha mwaha wo uttunana unkhumma munrimani mutteenlhee, nrima wo uthanana upanga chittu chorera ni nrima wo uhikhalha ni unafiki.

⁶ Attu akina ahohiya upanga yayo ni urukunuwelha miaha cho uhikhalha ni maana.

⁷ Anothananacha ukhalha o wiittuchiha Malhehero a Nlhuku nansho ahichuwelhaka ittu inoolhumacha aya ama inomindelha aya.

⁸ Ninochuwelha wiira, Malhehero a Nlhuku ari orera atwariyaka thoko chinothananiya aya.

⁹ Nansho nuupuwelheke wiira Malhehero a Nlhuku kheeshiye wo nlhatu ni attu orera nrima, nansho wa attu ahinvara ikekhiaye ni attu o uhilhoka ni attu ahinchuwenlhe Nlhuku ni attu o uwonya ni wa attu anopanga chittu cho unyalha ni attu ahinonthimicha Nlhuku ni attu aneevakacha manyanaangoro aya ni attu o niiviho.

¹⁰ Tho, Malhehero eeshiye wa attu o ulhavalhava ni wa attu o ishembwere yo uthelhana ni ashilhopwana nanaya ni attu anaathumiha attu nanaya ni attu o woothacha ni attu anolhupelha wo woothacha ni attu anovara meettuchiho ahirii e ikekhiaye. ¹¹ Thoko chihimiye aya nhina Malhove Orera a Nlhuku nototopelhiye arumelhelhiye wiira kivahiye mii kihimiache waattuni.

Upochera ikiriri ya Nlhuku

¹² Kinowaashukuru Athithi Kuristo Yesu akivanhe machiri munthekoni mwaka wo ukoona mii wiira kirii o ukhulhuvelhiya, nkayakithanlha wiira kaakavihe. ¹³ Inakhalhaka katarsi vawo kahaaruwana ni waatwarusha ni kaari ntu o uhilhokalhoka. Nansho Nlhuku ahokooneelha ikiriri ukhalhaway kaari kihinaya upisha nrima, kihichuwelhaka ittu kaapanga aka. ¹⁴ Nansho Athithi ahokivaha nnema waya mwinchi nkaakihelha nrima wo waarumelhelha ni uttuna urii wawihu muulhutaanani ni Kuristo Yesu. ¹⁵ Nna phi nulhumo no ukhulhuvelhiya, tho nikhalhaka no uvarecheshiya chinene. Kuristo Yesu aawilhe velhaponi wiira oopolhe attu o uwonya ni mii kihoolhaka waapwaha akina onkhaye ayo, ¹⁶ nansho wo yoyo nlhatu uyo Nlhuku ahokooneelha ikiriri, wiira Kuristo Yesu akoonihe uvilhelha wawe wonkhaye mii ntu o uwonya chinene. Kikhale phi o utwarihiya ni attu onkhaye anohalha unrumelhelha apochere ukumi wo uhimalha.

¹⁷ Wo ayo arii Amwene o mahuku o uhimalha, ahinokhwa, ahinoonia arii Nlhuku o vekha aya ayo, nthimicho ukhalheke uwannyaya, mahuku o uhimalha ni uhimalha! Aye.

¹⁸ Anaaka Natimotheo, kinoulheherani alha malhove alha wo ulhikaana ni malhove a anamilhoji aahimiye khalhayi veehaniye inyu, wiira akhalhe ikerero inyu yo waatakanelha rata ikhoto yo winkelha Malhove Orera, ¹⁹ ni uvarelha nrima winyu wo nnikwa woombone. Attu akina khayaavarenle minikwa chaya, paahi etu aheeva nrima aya. ²⁰ Akina aya phi

Nahumenayo ni Naalekizanda, attu kinvanhe aka Nakareaatwarushe, ikhalhe phi iphiyo yo weettuchiha ahinruwane Nlhuku.

2

Ulhapelha wa attu a Nlhuku

¹ Paahi etu, chihinaaya uchokholha chittu chickina, kinothanana wiira unlhepelha Nlhuku ni ulhapelha ni waalhapelha attu akina ni unshukuru Nlhuku chihimiyeke wo nlhatu na attu onkhaye. ² Mwaalhapelheke mamwene ni attu avarenlhe ikuru wiira nikhalheke rata ni mpuha ni umwoova Nlhuku ni ukhalha makhalhelho ateelhihiye. ³ Ulha phi mwaha woombone unon-teelhiha Nlhuku Moopolhi ihu, ⁴ nothanana attu onkhaye oopolhiye achuwelhe ikeekhene.

⁵ Ukhalhawayo Nlhuku rii mmoka ni tho haawo mmoka neewananiha attu ni Nlhuku, yoyo ntu uyo phi Kuristo Yesu, ⁶ ekuminhe mwanene wiira oopolhe attu onkhaye. Wowo phi waari uhimiechesha ikatema yaathananiya vaatiminre aya wiira Nlhuku nothanana wookholha attu onkhaye. ⁷ Ni mii wo yoyo nlhatu uyo etu kihothanliya ukhalha karumiya keettuchihe attu ahiri Ayahudi, kihimiache ntenga wo upisha nrima ni ikeekhene. Kinoolhumacha ikeekhene, mena akinooothacha!

⁸ Paahi etu, kila vanokumaana inyu unlhapelha Nlhuku, kinothanana attu onkhaye atheesheke miono chiri chitakatifu ni ulhapelha wo uhithunalha mena wo uhitukutuwacha. ⁹ Vavawo tho, kinothanana manyopani amaalheke ni wiitimarikha ni uwewa ikuwo chinowara

aya, awarelheke rata kuhii wo utiva ikehrari uhinophwanelha mena wiipamba wo chittu cho idhahabu ama ilulu ama ikuwo cho nhakhu mwinchi,¹⁰ nansho awarelheke wo mitheko choombone thoko chilheheriye aya uwarelha manyopani anomwoova Nlhuku.¹¹ Manyopani amaalheke ni wiitimarikha vaneettuchihiya aya.¹² Mii akinaahiyera manyopani weettuchiha manyaalhopwana ama waatawara, amaalheke.¹³ Ukhahawaya Adamu phi achokhonlhe wuupiya, Ahawa nkaatwara.¹⁴ Mena Adamu khayaathepiachiye nansho opani phi athepiachiye, nkaawonya Malhehero a Nlhuku.

¹⁵ Inakhahaka chiicho etu, opani anowoopolhiya ukumi aya wo waayara ashaana, alhokelhaka ni upisha nrima, uttunana, utakatifu ni nrima woombone.

3

Aholhelhi o nlhoko wa attu anrumelhenhe Kuristo

¹ Nna nulhumo nna phi no ukhulhuvelhiya, ntu nothanana ushunga nlhoko wa attu anrumelhenhe Kuristo yoyo hothanana ntheko woombone. ² Paahi etu, ntu noshunga nlhoko wa attu anrumelhenhe Kuristo akhalheke ntu o uhilhaphachiya, nlhopwana ri ni opani amoka, ntu o wiitawara, ntu o wiitimarikha, ntu o meetelho oombone, ntu naapochera attu, nooria weettuchiha attu, ³ ntu o uhihapalhiya ama ntu o mahuchuru nansho o ntu o ikiriri, naathana mpuha, hirii ntu o uttuna nchurukhu chinene. ⁴ Ntu noshunga inupa awe rata

ni waalhelha achishaana awe ukhalha attu o umanya.⁵ Ukhahawaya ntu aahorieke weemelhelha inupa awe rata, nohalha wooria chani ushunga nlhoko wa attu a Nlhuku?⁶ Ntu rumelhenhe katashi hipangkiye ukhalha nhelhelhi, hiwe eefuna ni uhukumulhiya thoko chenre awe Nakare.⁷ Tho, ahimiecheshiyeke ukhalha ntu o meetelho oombone mwa attu ahinatwara nlhoko wa attu anrumelhenhe Nlhuku, hiwe aalhaphachiya nkaawaya nrinkho wa Nakare.

Akavihi o nlhoko wa attu anrumelhenhe Kuristo

⁸ Akavihi o ntheko wo ukavihera nlhoko wa attu anrumelhenhe Kuristo akhalheke attu o meetelho oombone, aneemelhelha nulhumo naya, ahinohapalhiya utheka ama o nikakata no uttuna nchurukhu chinene,⁹ anvarechesha ikeekhene yo nrina worera ipatakulhiye.¹⁰ Yayo aphimiyeke thoko, ooniyaka wiira kharina nlhatu wo ukhuwachiya, paahi etu, avareke ntheko wo ukaviha nlhoko wa attu anrumelhenhe Kuristo uyo.¹¹ Thothoni tho, manyaahanu aya akhalheke attu o meetelho ombone, ahinaapa akhunanaya, o wiitawara ni o ukhulhuvelhiya wo chittu chonkhaye.¹² Namitheko okaviha nlhoko wa attu anrumelhenhe Kuristo nothananiya akhalheke nlhopwana o opani amoka nooria weemelhelha rata inupa awe ni waalhelha rata achishaana awe.¹³ Ukhahawaya akavihi anovara ntheko rata anoothimichiya rata, ni ayo anwooria uhimiacha wo uhoova mwaha

unaacha nrima urina aya muulhutaanani ni Kuristo Yesu.

Ikekheene ipatakulhiye

¹⁴ Kinolhepa ilha iwarakha ilha uwaninyu kikhulhuvelhaka uwa uwoonani phiyaru. ¹⁵ Nansho kacherewihiyaka, paahi etu ilha iwarakha ilha, inouhimeriani meetelho ninothananiya ihm ukhalhana attu o iwani ya Nlhuku, irii nlhoko wa attu anonrumelhelha Nlhuku rii nkumi, rii phi nipoto ni nsingi we ikekhenne. ¹⁶ Khaniwo nipampa vachulhu mwaha uvithiye unaacha meetelho ihm o munrimani,
 Ahoonia wo iruttu yo munttuni,
 Ahohimiecheshiya ni Iphumu wiira ri o
 uvarechesha ikekhiaye
 Ahoonia ni minepa o wiirimu.
 Ahohimiachiya mwaattuni,
 Ahorumelhelhiya ni attu onkhaye o velhaponi,
 Ahokushiya uchulhu unthimichoni.

4

Owiittuchiha o woothacha

¹ Iphumu ya Nlhuku nohimia mwaari wiira mahuku anowa attu akina anowa uhiya nrima aya, anoowa aatwara minepa cho woothacha ni uttwara meettuchiho o mashoka o unanara. ² Meettuchiho thoko yayo anowanelhihiya ni anafiki, mirima chaya cho uchuwelha mombone ama chittu cho uhlhoka chuumaka thoko chipahiye ni iyuma yo mooro. ³ Yayo attu ayo anowaachiichiha attu ahiveke ama ahilhie cholhia chuupilhe awe Nlhuku wiira chipocheriye

wo ushukuru ni attu o nrima anochuwelha ikekhenne.

⁴ Kila ittu yuupilhe awe Nlhuku irii yorera, khipiyo yo ukhotiya nansho kila ittu ipocheriyeke wo ushukuru, ⁵ ukhalhawayo nlhove na Nlhuku ni ulhapelha phi nopanga yevo phi nohapiha ittu iyo ipocheriye mmiholho wa Nlhuku.

Karumiya o ukhulhuvelhiya a Yesu Kuristo

⁶ Mwaahimeriaka ashilhoko ihu alha malhehero alha, nnookhalha karumiya o ukhulhuvelhiya a Kuristo Yesu, mwiilchunnuwihaka mwaanene wo malhove o munnepani o nrima ni meettuchiho o ikekhenne nnotwara inyu mwaanene. ⁷ Nansho nhyeke wiiwelhelha ithelhi cho irusho chihiri cho munnepani chihiri ni maana. Mweettuchiheke attu ukhalha thoko chinothanana awe Nlhuku. ⁸ Wiichookolha iruttu unoohloka nansho makhalhelho anonteelihiha Nlhuku ukhalhawayo ahonilheha upatta ukumi wo vano ni uyo unowa. ⁹ Nenno phi nulhumo ne ikekhiaye chinene ni noolhoka chinene. Ukhulhuvelhiya anonikhulhuvelhiha ikekhiaye imphwanelhiya upocheriya. ¹⁰ Hii nirii muuvvarani ntheke wo machiri ukhalhawayo niheesha nikulhuvelho nihu wa Nlhuku rii nkumi rii Moopolhi a attu onkhaye, athepaka ayo anorumelhelha Kuristo ayo.

¹¹ Yayo phi malhehero anothananiya inyu weettuchiha ni waakurumicha wiira apangeke chiicho. ¹² Ntu riyothe huuvehacheni wo nlhatu no ukhalha winyu amirawo. Nansho nkhalheke ntu o utwariya ni attu anrumelhenle Kuristo wo moolhumo inyu ni meetelho inyu

ni uttuna winyu ni nrima winyu ni makhahelho orera anokhalha inyu. ¹³ Nlhokelheke nshomaka ni uhimiacha ni weettuchiha attu Malhove Matakatifu mpaka vanohalha aka uwa. ¹⁴ Nhihiye wooniha mahalha o Iphumu ya Nlhuku nrina inyu, mwaavahiye inyu wo malhove a anamilhohi ni wo weesheriya miono ni ashulhupalhe. ¹⁵ Muupuwelheke rata chonkhaye chiyo ni upanga, wiira attu onkhaye ooneke meetelho inyu orera chineera aya wo uthepa. ¹⁶ Mwiishungeke rata ni uweha chineera inyu wo weettuchiha attu. Nthepeke chiichammo ukhahawaya mwapangaka chiicho, nnowiichoopolha mwaanene ni ayo anowiiwani ayo.

5

Iphiro cho ukhalha rata ni Akuristo naninyu

¹ Nhaachacherache ashulhupalhe, nansho mwaalhoheke thoko chineera inyu wo waalhoha athumwaninyu. Mwaalhoheke ashimirawo thoko chinaalhoha inyu achihima inyu, ² mwaalhoheke manyopani olhupalhe thoko chinaalhoha inyu anumwaninyu ni imialhi thoko ashirokorinyu, wo haamirelha ishenye, wo ukhalha makhalhelho orera.

³ Mwaalhoheke manyanankhwelhi o ikeekhene. ⁴ Nansho manyanankhwelhi ari ni iyari, ashaana ama uchuulhu, apangeke thoko Nlhuku chinothanana awe. Yeyo inokhalha phi iphiro yo waalhiva manyanaangoro ni manyaapwiya aya inonteelhiha Nlhuku. ⁵ Anankhwelhi o ikeekhene, ahiri ni ntu o waalhelha, yayo anonkhulhuvelha

Nlhuku anlhapelhaka uhiyu ni uthana wiira oopuwelhiye. ⁶ Nansho anankhwelhi anokhalha wo wiipuha, yayo anokhalha thoko ahokhwa, inakhalhaka akumi. ⁷ Mwaalhehereke attu wiira apangeke yayo, ahiwe aalhaphachiya. ⁸ Yakhahaka ntu khanaalhoha amuchi awe, athepaka attu o uwannyawe, yoyo horuna nrima awe, ni unanara umpwaha ntu hinapisha nrima wo urumelhelha.

⁹ Nhaalhakelhe machina a anankhwelhi ariyothe yaahikhalhe aphiyenlhe malhipa o iyaakha makumi sita. Tho yaari opani o nlhopwana mmoka, ¹⁰ ni ayo ahimiecheshiye ukhalha o rera nrima, aalhenlhe achishaana aya rata, aapochenre alheto unupani waya, aavanhe maashi o ukhucha attu a Nlhuku, aakavinhe attu aahuva ni ekuminhe upanga chittu choombone.

¹¹ Nhaalhakelhe machina a anankhwelhi imialhi, ukhalhawaya iruttu chaya chakeliyaka ikhwilhu, anoothanana uthelhiya tho nkayanyhiya Kuristo, ¹² nkayeehukumulha ukhalhawaya ahohiya nrima waarumelhelha aya katashi vavo. ¹³ Anankhwelhi thoko yayo phi nochokholha weetakacha wo uhikhalha ni maana mmanupani. Wo uthepa anowiittucha waapa attu ni wiihelhahelha nkittu nhiri mwawayaya, olhumachaka chittu chihaathananiya aya wulhumacha. ¹⁴ Paahi etu, kinoona wiira, manyanankhwelhi imialhi ahiiyeke atheliyike, aayareke ashaana ni ulhelha inupa chaya, ahiwe aavaha amalhaponi ihu nipesha no unulhumelha chittu cho uhilhoka.

¹⁵ Ukhahawaya anankhwelhi akina ahomalha

uwonya ni unttwara Nakare. ¹⁶ Nansho yakhala-haka opani anrumelhenlhe Kuristo ahaana al-hoko aya arii anankhwelhi o ikekhiaye, yayo phi nophwanelhiya waalhelha, mena kuhiwe uhiya ntheko upangiye ni nlhoko wa attu anrumelhenlhe Kuristo, ikhalhe wiira nlhoko wa attu anrumelhenlhe Kuristo apangeke ntheko wo waalhelha manyanankhwelhi ahiri ni ittu menamena.

¹⁷ Ashulhupalhe anaaholhelha rata nlhoko wa attu anonrumelhelha Kuristo ahophwanelhiya uvahiya mahalha velhi, athepaka ayo amminda uhimiacha ni weettuchiha attu. ¹⁸ Ukhalhaway Malhove Matakatifu aneera, “Nhinttuke mwannama uwano vanolhimihiya awe.” Ni chiichammo etu “Anamitheko ahophwanelhiya malhivo.” ¹⁹ Nhipochere milhatu cha ashulhupalhe anoholhelha nlhoko wa attu anrumelhenlhe Kuristo, chaahiwihiyeke ni uhimiecheshiya ni attu elhi ama araru. ²⁰ Mwaamukeke vaattuni attu anowonya, attu akina ayo yooveke.

²¹ Kinoulheherani mmiholho wa Nlhuku ni wa Kuristo Yesu ni wo minepa o wiirimu chithanliye, wiira nvarechesheke malhehero alha, mena nnihukumulhe wo ichimwa ama ummweha wiitho ntu riyoote wo kila nlhatu unowiiheriya inyu. ²² Nhaakuvihe ummaha ntu ntheko wo uholhelha nlhoko wa attu anrumelhenlhe Kuristo. Nnikavihe uwonya wa attu akina, mwiichinanelheke mwaanene nhinanarihiye.

²³ Nhiwurie maashiru nansho mmwurieke idivai vakani wo nlhatu no nthunkwa ninyu

ukhalhawaya ninouwerianи venchi.

²⁴ Uwonya wa attu akina unowoonia mwaari ata ahinaya uhukumulhiya. Nansho uwonya wa attu akina unowa woonia vanohalha aya uhukumulhiya. ²⁵ Chiichammo etu, meetelho oombone anowoonia mwaari, ata ayo ahinoonia ayo khanooria wiivitha.

6

¹ Attu onkhaye arii mpottani yaathimicheke anene ntheko aya ayo wo kila ittu, nchina na Athithi nihewe naaruwaniya mena meettuchihiho iku. ² Ipotta cha anene ntheko aarumelhenlhe Athithi, ahaanyoholhache ashinene ntheko aya wo woona ukhalha Akuristo nanaya tu. Nansho apangeke ntheko rata ukhalhawaya ayo am-patta ifaida munthekoni mwa ipotta ayo ni ayo anowaattuna.

Mwiittuchiheke ni uhimiacha ulha mwaha ulha.

Meettuchiho o woothachiya

³ Ntu riyothe neettuchiha chittu chihinlhikaana ni meettuchiho o ukhalha chinothanana awe Nlhuku ni mena hinorumelhelha malhove e ikekhone a Athithi Yesu Kuristo, ⁴ yoyo ntu uyo hochara nikakata no wiititihacha ni mena khachuwenlhe ittu iriyothe. Yoyo phi ntu o uttuna mwaha wo uvaanyihana ni waahimeriacha attu chittu cho uhikhala ni maana, aanyulhachaka ihache ni indewo ni uruwanana ni wupuwelha chittu cho uhilhoka, ⁵ ni uvaanyihana uhinomalha ukhuma wa attu o uhikhala ni irusho, attu ahiri ni ikekhone. Attu anaanyihera

wiira uvara ntheko wa Nlhuku phi iphiro yo upatta nhakhu.

⁶ Eiyo we ikekhiaye uvara ntheko wa Nlhuku unommaha ntu nhakhu mwinchi yakhalkaka nooteelhiya wo chittu chirina awe.

⁷ Ukhalkawaya khanaawilhe ni ittu iriyoothe velhaponi va ni mena khaninokusha ittu iriyoothe nihuku nihu no uthama velhaponi va.

⁸ Paahi etu yakhalkaka nihanaa cholhia ni ikuwo, nipisheke nrima. ⁹ Nansho attu o irusho cho uthanana ukhalha ni nhakhu anoowulhuwa mu ulhikachiyani ni uwayihiya nriankho wo nikakata ninchi no uhilhoka no uhikhalkha maana ninaapurulhelha uutanganyiyani lhakalkaka. ¹⁰ Ukhalkawaya nrima wo uthanana nchurukhu chinene phi machokholhelho o uwonya wonkhaye. Attu akina ahothanana chinene upatta nchurukhu mpaka nkayaakukuriacha, nkayaahiya nrima ni mirima chaya chihopahiya chinene wo ihuzuni.

Malhehero u Natimotheo

¹¹ Nansho inyova nrri ntu a Nlhuku va, nhittware yoyo mwaha uyo. Nvarechesheke ikekchia rata ni unthimicha Nlhuku ni upisha nrima ni uttunana ni uwilhelha ni wiitimarikha.

¹² Mwaatakanake wo machiri ikhoto yo munrimani wiira nhilhikachiye, nvarechesheke ukumi inyu wo uhimalha mwiihanelhiye inyu mmiholho wa o uhimiechesha enchi wo unrumelhelha Kuristo. ¹³ Kinoulheherani mmiholho wa Nlhuku nokumiha ukumi wo chittu chonkhaye ni mmiholho wa Kuristo Yesu nohimiechesha ni urumelhelha ikekheni mmiholho wa Apontio

Pilato, ¹⁴ wiira nvarechesheke malhehero inyu, nkhalheke attu o uhikhuwachiya mpaka nihuku Athithi Yesu Kuristo vanohalha aya ukhumelhelha. ¹⁵ Ukhumelhelha waya unowa ukhalha ikatema vanohalha aya waaya yeeshiye ni Nhuku o mpuha nototopelhiya, rii ntawara o vekha awe, Mwene o mamwene ni Athithi o manyaathithi. ¹⁶ Yoyo vekha awe phi o uhikhwa rii nokhalha munthukoni nhinaatameriya ni ntu riyothe. Khaawo ntu pantte umwoona ama nooria umwoona. Nthimicho ni ikuru chikhalheke uwannyawe mahuku o uhimalha! Aye.

¹⁷ Mwaalhehereke attu o nhakhu wo velhaponi va wiira ahiifune, ahikhulhuvelhe nhakhu uhinkhulhuvelhiya. Nansho, ankhulhuvelheke Nhuku nonivaha chittu chonkhaye wo urera wawe wiira nипуheke. ¹⁸ Mwaalhehereke wiira apangeke morera ni ukhalha attu o nhakhu wo upanga menchi moombone, akhalheke attu ari tayari waakawelha attu akina nhakhu aya. ¹⁹ Yapangaka chiichammo anowiicheeshera nikhipi ninohalha ukhalha thoko nsingi wo ulhama unowa aya ukhulhuvelha mahuku anowa. Vavawo anowa aapatta ukumi urii ukumi we ikekjhene.

²⁰ Inyu Natimotheo, nshungeke rata chittu chonkhaye chivahiye inyu. Nhiihelhe malhove o uvaanyihana mwaha wo velhaponi wo uvaanyihana uhiri ni maana waachaka ittu attu ineehana aya Irusho cho ushomiya. ²¹ Ukhalhawayaya attu akina aheepanga ukhalha attu o irusho cho uchuwelha thoko chechiyo. Ni wo upanga chiicho etu ahoriba nrima waya.

Kinoulhepelhelhani wiira nnema wa Nlhuku
ukhalheke ni inyu mwaatti onkhaye!

**Makua New Testament 2015
Makhuwa-Meetto: Makua New Testament 2015 New
Testament**

copyright © 2016 The Word for the World International

Language: Makhuwa-Meetto

Contributor: The Word For The World

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-11-11

PDF generated using Haiola and XeLaTeX on 11 Nov 2022 from source files dated 29 Jan 2022

87ae4d2f-90f6-5bdd-b41e-00464a1ad514